

## 14 PAARE (JUZ) KA MUQTASAR TAARRUF

Disclaimer:

Arshad Basheer madani ke urdu books ko Roman English mai lane wale ahabab Mubarakbadi ke mustahiq hai ke unoun ne asan kia urdu reading Na janne Waloun ke liye

الحمد لله

فجزاكم الله خيرا

Note : arshad basheer madani ne Word to Word check nahi kia Kiunke bohot books ko roman Kia gaya un sab ko Check karna asan nahi, time ka commitment deegar Urdu books Aur syllabus par laga huva hai is liye badi mazirat ke sat arz hai ke jahan kahin apko pronunciation ya talaffuz mai Diqqat lage Urdu Janne Waloun se asal Kitab ki taraf rujoo farmaen in sha Allaah in sha Allaaah

Askislampedia ki Team ka shukriya ke Roman mai book lane mai madad faramee

Khas tour se

Riaz bhai , shaikh abdullah Umeri, faheem iqbal , Mushtaq ahmed Aur baz sisters bhi hain jo madad kie Aur kuch brothers bhi madad kie Likin ijazat nahi hai ke unka naam zikr Kia jae Allaah qabool farmae sab ki mahant

\*\*\*\*\*

Ameen

Shukriya

Shoba e nashro ishaat,

Askislampedia

## MAZAAMEEN QURAAAN KA JAAME WA MUQTASAR TAARRUF

### PARA 14 – RUBAMA

Chowdhwen paare ko ahle ilm ne 16 units me taqseem kiya hai jo hasbe zel hai :

Units ke hisaab se para no 14 “Rubama” ki aayaat aur mazaameen ki taqseem

#### Soorah Hijr

Units	Aayaat	Mazaameen
Unit no 1	1 – 15	Har do me Allaah ne Rasoolon aur Nabiyon ko bheja aur ab qiyamat tak ke liye Quraan wa Ahadees mahfooz hai, lihaza Muhammad ﷺ ke baad ab koyi Nabi aur Rasool aane waale nahi na zaroorat hai, kaafir tamanna karenge ke kaash ham bhi musalmaan hote, kuffar ki sarkashi ka zikar kiya gaya, Allaah ke Nabi ﷺ ko tasalli dee gayi, agar aasmaan ke tamaam darwaaze bhi khol diye jaaye tab bhi ye eemaan nahi laayenge.
Unit no 2	16 – 25	Aasmaan ke sitaron ka zikar, kaaynaat me paaye jaane waale khazano ka zikar aur un khazano ka akela maalik Allaah Taala hai, aasmaan se Allaah Taala paani barsaate hai, zindagi aur maut Allaah Taala ke haath me hai, qiyamat ke din tamaam ko jama karne ka bayaan.
Unit no 3	26 – 48	Insaan ko khankhanaati huyi mitti se paida kiya gaya, Adam wa iblees ka qissa, jahannam aur jahannam ke darwaazo ka zikar, jannat aur jannatiyon ka zikar.
Unit no 4	49 – 84	Naa farmaan qoumon ka bayaan.
Unit no 5	85 – 99	Quraan baar baar dohraayi jaane waali kitab hai, tamaam kaaynaat ka khaalikh sirf Allaah hai, qoum Saaaleh ka muqtasar zikar, Allaah ke Nabi ko jhutlaane waalon ka ibrat naak anjaam ka zikar, yaqeeni kaamil ka bayaan.

#### Soorah Nahal

Unit no 6	1 – 2	Jo log qiyamat ke mutamanni hai unki ye tamanna anqareeb poori kar dee jaayegi, wahee ka bayaan.
Unit no 7	3 – 16	Nematon ka tafseeli bayaan.

Unit no 8	17 – 21	Tamaam nematon ka khaaliq sirf Allaah Taala hai.
Unit no 9	22 – 35	Taqwa ki madah aur takabbur ki mazammat.
Unit no 10	36 – 50	Har qoum ke liye Rasool bhejne ka zikar, qiyamat qaayam hone ka zikar, Rasoolon ko jhutlaane waalon ko saqt azaab ki wayeed, hijrat ki ahmiyat aur fazeelat bayaan kee gayi.
Unit no 11	51 – 65	Ibrahim Alaihissalaam ka qissa, Loot Alaihissalaam aur qoum loot ka zikar kiya gaya, qoum loot ke azaab ka bayaan.
Unit no 12	66 – 89	Allaah ke alaawa koyi ibadat ke laayaq nahi, har ek se uska hisaab liya jaayega.
Unit no 13	90 – 97	Makaarim al aqlaaq ka bayaan, qasmon aur ahad ko poora karne ka hukum, Allaah jise chahe hidayat de aur jise chahe gumraahi de, mard ho ya aurat amal saaleh karen to unko behtareen badla ata kiya jaayega.
Unit no 14	98 – 111	Quraan padhne se pahle ta’awwuz padhne ka bayaan, arabi zabaan ki ahmiyat, Quraan par eemaan na laane waalon ke liye saqt azaab, murtad ka zikar aur unke liye saqt azaab ki wayeed, hijrat karne waale, sabr karne waale aur qitaal karne waale Allaah ke pasandeeda bande hai.
Unit no 15	112 – 119	Jo Allaah Taala ki nematon ka kufr karte hai Allaah Taala unhe azaab ka maza chakhate hai.
Unit no 16	120 – 128	Yahood ke liye hafte ke din ko muqarrar karne ki wajah ka bayaan, deen ki taraf mauizat wa hikmat se bulaane ka hukum, qisaas ka bayaan.

## **SOORAH AL-HIJR**

### **The Rocky Tract**

#### **Tode**

#### **Maqaam Nuzool – Makkah**

## Baaz Ahdaaf

- Is soorat me bataya gaya ke Allaah apne deen ki hifazat karne waala hai, vo dushman se na dare balke daawat wa tableegh ke kaam me lag jaaye (mazeed maaloomaat ke liye is kitab ko zaroor padhe - \_\_\_\_\_ : Abdul Aziz bin Abdullah bin Baaz)
- Jab Makkah me haq wa baatil ki jung urooj par un saqt haalaat me ye soorat ka nuzool hua.
- Jab iblees ne bhi kaha ke mai insano ko gumraah kar doonga to Allaah ne kaha mere nek bando ka too kuch nahi bigaad paayega. Goya Allaah ne Islam, Quraan aur musalmaano ki hifazat ki zimmedaari lee hai.
- Hijrat Madinah Munawwarah Shaam (Syria) ke darmiyaan ek waadi ka naam hai, jahaan qoum samood ka wajood milta hai.
- Hijr "Hajar" se nikla hai kyu ke ye qoum chattano ko taraash kar mahlaat banane me maahir thi.
- Hijr Kaaba ke qareeb ki wajah bhi batlaayi gayi, Wallahu Aalam!
- Al Hijr se muraad vo maqaam hai jahaan samood rihayish pazer the. Vo chattano me ghar taraasha karte the, goya koyi toofan, bijli ya zalzala unka kuch nahi bigaad paayega.....(mazeed tafseel ke liye Tafseer Tibri, jild/17, safa 126)

## Munasibat / Latayef Tafseer

- Soorah Yunus se Soorah Ibrahim tak Anbiya ke naam se soorat mausoom kee gayi, jabke Soorah Hijr se Soorah Kahaf tak qoum ke hisaab se soora ka naam aur mazmoon milta hai, yaani kahi daayi ka pahloo numaya hai aur kaahi mad'oo ka pahloo numaya hai.

Unit no 1 :

14 para, Soorah Hijr, Soorah no. 15 ki aayat no 1 se lekar 15 me ye bataya gaya hai ke Allaah Taala Rasoolon ko bhejte hai, ye Allaah Taala ki sunnat hai, Quraan Majeed ko Allaah Taala ne mahfooz rakha aur Sahi Ahadees bhi mahfooz hai, taake qiyamat tak logon ko rahnumayi haasil hoti rahe, lekin jin logon ki kufr par

maut hoti hai aakhirat me vo kahenge ke, Aye Kaash, ham bhi musalmaan hote, chunache qiyamat ke din har kaafir ki yahi tamanna hogi, fir uske baad kuffar ki sarkashi, takabbur aur zid hat dharmi ka zikar kiya gaya, kuffar wa mushrik Allaah ke Nabi ﷺ aur wahee ka istehaza kiya karte the aur Aap ﷺ ko majnoon kaha karte the, in sab baaton ka jawaab diya jaa raha hai, aur Allaah ke Nabi ﷺ ko tasalli dee jaa rahi hai aur kaha jaa raha hai ke, agar unke liye aasmaan ke tamaam darwaaze bhi khol diye jaaye tab bhi ye log eemaan nahi laayenge.

Unit no 1 : ke mauzoo'at

- Quraan se mutaallikh mushrikeen ka mauqif aur unki sarkashi ka bayaan (1-8)
- Quraan ki Allaah hifazat karne waala hai (9)
- Guzishta ummato ka apne Nabiyo ko jhutlaane ka bayaan (10-15)

Unit no 2 :

14 para, Soorah Hijr, Soorah no. 15 ki aayat no 16 se lekar 25 me ye bataya jaa raha hai ke aasmaan me jitne bhi sitaare hai vo tamaam ke tamaam khoobsoorat hai aur ye Allaah ki taraf se nishaaniyaan hai agar koyi unme ghour wa fikar karega, vo ibrat ka saamaan paayega, aur ye bataya gaya ke tamaam kaaynaat me Allaah ke khazaane bhare huye hai, in tamaam khazaano ka Allaah Taala akela maalik hai, aur kaha gaya ke Allaah Taala aasmaan se paani barsaate hai, zindagi aur maut sab Allaah Taala ke haath me hai, Allaah Taala qiyamat ke din tamaam logon ko jama karega, vo badi qudrat waala hai.

Unit no 2 : ke mauzoo'at

- Allaah ki apne bando par qudrat ka bayaan aur uski nematon ka zikar (16-25)

Unit no 3 :

14 para, Soorah Hijr, Soorah no. 15 ki aayat no 26 se lekar 48 me ye bataya gaya ke insaan ko khankhanaati mitti se paida kiya gaya, farishto aur jinnaat ko hukum hua ke Adam ka sajdah karen, sivaaye iblees ke tamaam ne sajdah kiya, uske

baad iblees dhutkaar diya gaya, qiyamat tak us par laanat jaari rahegi, fir iblees ki naa farmaani ka bayaan ho raha hai, iblees ne kaha ke vo nasl aadam me har fard ko bahkaata rahega, fir jahannam aur uske darwaazon ki tafseel batayi gayi, in darwaazon se iblees ke pairokaar ko guzara jaayega jo muqtalif grohon me munqasim honge, fir uske baad jannat ka zikar kiya gaya aur bataya gaya ke jab jannatiyon ko jannat me daakhil kiya jaayega to unke seeno ko keena aur kapat se paak kar diya jaayega, fir uske baad unko jannat me daakhil kiya jaayega.

Unit no 3 : ke mauzoo'at

- Insaan aur jinnaat ki maqlooh ka zikar aur malayika ke aadam ko sajdah karne ka bayaan (26-30)
- Iblees ka inkaar aur uske pairokaaron ka anjaam (31-44)
- Muttaqeen ke sawaab aur unke anjaam ka bayaan (45-50)

Unit no 4 :

14 para, Soorah Hijr, Soorah no. 15 ki aayat no 49 se lekar 84 me bataya jaa raha hai ke Allaah Taala ke naa farmaan qoume masalan – qoum samood, qoum loot, qoum aad aur ashaabul **aikiyah** darakht ke neeche baith kar saazishen karne waale, naaa farmaani karne waale aur Shuaib Alaihissalaam ki qoum ka zikar aaya hai.

Unit no 4 : ke mauzoo'at

- Ibrahim Alaihissalaam ke mehmaan aur Loot Alaihissalaam ki qoum ke logon ka anjaam (51-77)
- Ashaab ul **aikiyah** aur ashaabul hijr ka bayaan (78-86)

Unit no 5 :

14 para, Soorah Hijr, Soorah no. 15 ki aayat no 85 se lekar 99 me bataya gaya ke Soorah Al Fatiha saba'a masaani hai, yaani baar baar dohraayi jaane wali soorat hai aur iske baad kaha gaya ke Allaah Taala tamaam maqloohaat ka qaaliq haqeeqi hai, vo adl wa insaaf karne waala hai aur ek muqarrar din par qiyamat qaayam hokar rahegi, iske bad qoum Saaleh ka zikar kiya gaya jo ek naa farmaan

qoum thi aur ye qoum apne nabi ko eeza pahuchaane me pesh pesh thi aur uske baad ye kaha gaya un logon ka maamla to bahut hi bura hone waala jinhone Allaah ke Nabi ﷺ ki risaalat ki takzeeb ki aur Aap ﷺ ko jhutlaaya yahaan par kuffar quraish, mushrikeen ke saath yahood wa nasara bhi muraad hai aur uske baad soorah ki aakhir me yaqeen kaamil ka tafseeli bayaan zikar kiya gaya.

Unit no 5 : ke mauzoo'at

- Nabi ﷺ par Allaah ka fazal aur Aap ke liye bashaaraten (87-99)

## Soorah An-Nahl

### The Bee

### Shahed ki Makkhi

### Maqaam Nuzool – Makkah

### Baaz Ahdaaf

- Is soorat ka mahwar hai :  
Tawheed, Baas Baadal Maut, Wahee, Iqaamat hujjat, kaaynaati dalayel aur nematon ki kasrat, Aala Allaah aur Ayyaam Allaah ka **imtezaaj**.
- Is soorat ka hadaf hai Allaah ki nematon par shukar bajaa laana (mazeed maaloomaat ke liye is kitab ko zaroor padhe - \_\_\_\_\_ : As Shaikh Abdul Aziz bin Baaz Ghafarallahluhu)
- Is soorat me Allaah ki be inteha nematon ka zikar kiya gaya hai.
- Is soorat ka naam Nahl isliye hai ke isme shahad ki makkhi ka ba taur nemat zikar aaya hai (Aayat:68,69) [mazeed tafseel ke liye dekhiye, Tafseer Qurtubi jild/10/safa 122]
- Soorah Nahl me daawat aur jidaal ka hukum diya gaya, daawat ka kaam hikmat, mauizat hasna aur jidaal ahsan se hota hai. Ibn Taimiyah Rahimahullah farmaate hai, teen tarah ke log hote hai : 1. Hikmat se samajhne waale log, 2. Mauizat hasna se samajhne waale log, 3. Jidaal se samajhne waale log, ya ayyam hujjat ka misdaaq banne waale log. (Daawatul Ghairul Muslimeen – Abdur Razzaq Al Badar Al Ibaad)
- Islam duniya me masbat taameer (positive development) se nahi rokta ba shart ke vo daayra Islam se na takraaye.

## Munasibat / Latayef Tafseer

- Is se pahle ki sooraton me kuffar ki saazishon aur azaayem ka zikar hai, is soorat me inzaar aur haq ke ghalbe ka bayaan hai.

Unit no 6 :

14 para, Soorah Nahal, Soorah no. 16 ki aayat no 1 se lekar 2 me ye bataya jaa raha hai ke jo log qiyamat ki jaldi me to Aap ﷺ kah dejiye ke qiyamat bahut nazdeek hai aur ye bhi kaha gaya ke jo log qiyamat ke din ki tamanna kar rahe hai unki ye tamanna poori kar dee jaayegi, iske baad wahee ka taarruf karaya gaya.

Unit no 6 : ke mauzoo'at

- Allaah ki wahdaaniyat ki nishaniyon ka zikar aur uski qudrat wa inaamaat ka tazkirah (1-23)

Unit no 7 :

14 para, Soorah Nahal, Soorah no. 16 ki aayat no 3 se lekar 16 me ye bataya jaa raha hai ke tamaam aalamon ka qaaliq sirf Allaah hai, aur insaan ek qatre se paida kiya gaya, iske bawajood vo jhagdaaloo ban gaya, ye soorat Allaah Taala ke nematon ko khol khol kar bayaan karne waali soorat hai, choupaaye aur doodh dene waale jaanwaron ka zikar kiya gaya aur kaha ke tum is se faayde haasil karte ho aur kaha gaya ke ham tumhari sawaari ke liye ghode aur khachchar paida kiye, tum iske zariye raaste tay karte ho aur saath hi ye bhi kah diya gaya ke tumko seedhe raaste par chalna hai aur taqwa aur parhezgaari ko iqtiyaar kiye rakhna hai, yahi hidayat yaafta raasta hai, aur tumhare faayde ke liye ham aasmaan se paani barsaate hai aur uske baad kaha gaya ham din ko raat me le jaate hai aur raat ko din le aate hai, tum sooraj, chaand aur sitaaron ko apne apne madaar par qaayam kar rakha hai, kashtiyon ke zariye samandar ke maujon ko bhi hamne tumhare qaaboo me kar diya aur samandar ke jaanwaron ko hamne tumhara rizq bana diya aur hamne pahadon ko zameen me gaad diya taake zameen tum hila na sake.



Unir no 7 : ke Mauzoo'aat

- Allaah ki wahdaaniyat ki nishaniyon ka zikar aur uski qudrat wa inaamaat ka tazkirah (1-23)

Unit no 8 :

14 para, Soorah Nahal, Soorah no. 16 ki aayat no 17 se lekar 21 me bataya jaa raha hai ke tamaam cheezon ka qaaliq sirf Allaah hai jo kuch bayaan kiya gaya usko madde nazar rakh kar ye sawaal kiya jaa raha ke tum naseehat haasil kyu nahi karte? Aur agar tum Allaah ki nematon ko shumaar karna chaho to shumaar bhi nahi kar sakte, Allaah Taala tumhare zaahir aur baatin sab kuch jaanta hai.

Unit no 8 : ke mauzoo'aat

- Allaah ki wahdaaniyat ki nishaniyon ka zikar aur uski qudrat wa inaamaat ka tazkirah (1-23)

Unit no 9 :

14 para, Soorah Nahal, Soorah no. 16 ki aayat no 22 se lekar 35 me takabbur ki mazammat kee gayi aur taqwa ki madah kee gayi, aur kaha gaya ke takabbur karne waalon ko dardnaak azaab diya jaayega, muttaqi aur parhezgaar log aish wa aaraam se rahenge.

Unit no 9 : ke mauzoo'aat

- Takabbur karne waalon ka duniya aur aakhirat me anjaam (24-29)
- Qiyamat ke din muttaqiyon ka anjaam (30-32)
- Baas baadal maut ke baare me mushrikeen ke baaz gumraah khayaalaat (33-40)

Unit no 10 :

14 para, Soorah Nahal, Soorah no. 16 ki aayat no 36 se lekar 50 me bataya gaya hai ke hamne har qoum me Rasool bheje aur kaha gaya ke ek din qiyamat qaayam

hokar rahegi aur jo Rasoolon ko jhutlaane waale hai unko saqt tareen azaab diya jaayega aur uske baad hijrat ki ahmiyat aur fazeelat bayaan kee gayi.

Unit no 10 : ke mauzoo'aat

- Baas baadal maut ke baare me mushrikeen ke baaz gumraah khayaalaat (33-40)
- Muhajiron ka badla (41-42)
- Rasoolon ki haqeeqat aur unki ahmiyat (43-44)
- Kaafiron ke liye dhamki (45-48)
- Har cheez ka Allaah ke liye jhuk jaana (49-50)

Unit no 11 :

14 para, Soorah Nahal, Soorah no. 16 ki aayat no 51 se lekar 65 me Allaah Taala ki mazeed nematon ka zikar bayaan kiya gaya aur kah diya gaya ke Allaah Taala ke siva koyi ibadat ke laayaq nahi vo akela tamaam jahano ka Rab hai, aur kaha gaya ke har ek se uska hisaab liya jaayega aur usko apne kiye ka poora poora badla diya jaayega, aur kaha gaya ke Allaah Taala bando ko choot deta hai, mahoolat deta hai, agar Allaah Taala mahoolat na deta to zameen par ek insaan bhi baakhi na rahta, aur kaha gaya ke hamne har daur me Rasool bheje lekin shaitaan ne insaano ko apni raah par laga diya.

Unit no 11 ; ke mauzoo'aat

- Mushrikeen ke faasid aqaayed par radd aur unke anjaam ka zikar (51-64)

Unit no 12 :

14 para, Soorah Nahal, Soorah no. 16 ki aayat no 66 se lekar 89 me Allaah Taala ne mazeed aur nematon ka zikar kiya.

Unit no 12 : ke mauzoo'aat

- Allaah ki pesh baha nematen jo uski qudrat par dalaalat karti hai aur mushrikeen ka kufraan nemat karna (65-73)
- Tawheed aboodiyat par misaalen (74-76)

- Allaah ki nematon ka zikar jo uske ihaate ilm aur uski qudrat kaamilah par dalaalat karti hai aur mushrikeen ka kufraan nemat (77-83)
- Qiyamat ke din ki houlnaakiyon ka zikar (84-89)

Unit no 13 :

14 para, Soorah Nahal, Soorah no. 16 ki aayat no 90 se lekar 97 me makaarim ul aqlaaq ka bayaan hai, Allaah Taala ne qaraabatdaaron ke saath adl wa ahsaan ka maamla karne ka hukum diya aur sarkashi se mana farmaya, qasmon aur ahad wa paimaan ko poora karne ka hukum diya, Allaah Taala jise chahta hai hidayat ata karta hai aur jise chahta hai gumraahi me dhakel deta hai, mard ho ya aurat jo koyi bhi nek amal kare usko uska behtareen badla ata kiya jaayega.

Unit no 13 : ke mauzoo'aat

- Momineen ke liye taaleemaat (90-96)
- Saaleh aamaal karne waale momin ke liye hayaat tayyiba ka waada (97)

Unit no 14 :

14 para, Soorah Nahal, Soorah no. 16 ki aayat no 98 se lekar 111 me ye bataya jaa raha hai ke jab bhi Quraan padhne ki ibteda karo ta'awwuz padh liya karo, arabi zabaan ki ahmiyat ka tazkirah, Quraan par jo eemaan nahi laayenge Allaah Taala unhe saqt azaab dega, murtad hone waalon ka zikar aur unhe saqt azaab ki wayeed, hijrat karne waale, sabr karne waale aur qitaal karne waale Allaah ke pasandeeda bande hai.

Unit no 14 : ke Mauzoo'aat

- Quraan padhne ka hukum aur shaitaan se panah maangne ka bayaan (98-100)
- **Nasaq** ki hikmat (101)
- Quraan ki ahmiyat aur uski muftareen ke liye challenge (102-105)
- Murtadeen ka badla aur unki sifaat ka bayaan (106-110)
- Muhajireen ka badla (111)

Unit no 15 :

14 para, Soorah Nahal, Soorah no. 16 ki aayat no 112 se lekar 119 me ye bataya jaa raha hai ke, halaal wa haraam ka bayaan, Allaah se jo maghfirat talab kare Allaah Taala un logon ko maaf kar deta hai.

Unit no 15 : ke mauzoo'at

- Nematon ki naa shukri karne waalon ki misaal (112-113)
- Halaal wa haraam Allaah ke haath me hone ki daleel (114-119)

Unit no 16 :

14 para, Soorah Nahal, Soorah no. 16 ki aayat no 120 se lekar 128 me bataya jaa raha hai ke Ibrahim Alaihissalaam ek ummat jaise the, vo mushrikon me se na the aur Aap Alaihissalaam bahut shukar guzaar bande the, yahod ke liye hafte ke din ko muqarrar karne ki wajah aur asbaab ka bayaan, deen ki taraf achche aqlaaq aur mauizat aur hikmat se bulaane ka hukum aur jidaal ahsan ka bayaan, qisaas aur us se mutaallikh ahkaam wa masayel ka bayaan.

Unit no 16 : ke muzoo'at

- Hazrat Ibrahim Alaihissalaam ki sifaat aur Nabi Kareem ﷺ ko unki pairvi ka hukum (120-123)
- Yahood aur ashaab ul sabt ko dhamki (124)
- Nabi Kareem ﷺ aur du'aat ko chand naseehaten (125-128)